

<http://notker-balbulus.leperlily.org>

Notker Balbulus
Liber Ymnorum

Tempus Nativitatis
[N.04 – N.10]

Natus ante saecula
dei filius
invisibilis, interminus,

Per quem fit machina
caeli ac terrae,
maris et in his degentium,

Per quem dies et horae labant
Et se iterum reciprocant,

Quem angeli in arce poli
voce consona semper canunt:

Hic corpus sumpserat fragile
Sine labe
originalis criminis
de carne Mariae virginis,
quo primi parentis culpam
Aevaeque lasciviam tergeret.

Hoc praesens diecula loquitur
Praelucida,
adaucta longitudine,
quod sol verus radio sui
luminis vetustas mundi
depulerit genitus tenebras.

Nec nox vacat novi
sideris luce,
quod magorum oculos
terrui scios:

Nec gregum magistris
defuit lumen,
quos praestrinxit claritas
militum dei.

Gaude, dei genitrix,
quam circumstant obstetricum vice
concinentes angeli
gloriam deo.

Christe patris unice,
qui humanam nostri causa formam
assumpsisti, refove
supplices tuos,

Et quorum participem te fore
dignatus es, Jesu,
dignanter eorum
suscipe preces,

Ut ipsos divinitatis tuae
participes, deus,
facere digneris,
unice dei!

De Sancto Stephano
d. XXVI m. Dec.

[N.05] Hanc concordi famulatu

Hanc concordi famulatu
colamus solemnitate,

Auctoris illius exemplo
docti benigno

Pro persecutorum precantis
fraude suorum.

O Stephane,
signifer regis summe boni,
nox exaudi,

Proficue
qui es pro tuis exauditus
inimicis!

Paulus tuis precibus, Stephane,
te quondam persecutus
Christo credit

Et tecum tripudiat in regno,
cui nullus persecutor
appropinquat.

Nos proinde, nos supplices
ad te clamantes
et precibus te pulsantes,

Oratio sanctissima
nos tua semper
conciliet deo nostro.

Te Petrus Christi
ministerium statuit:
Tu Petro normam
credendi astruis,
Ad dextram summi
patris ostendendo
quem plebs furens crucifixit.

Te sibi Christus
delegit, Stephane,
Per quem fideles
suos corroberet,
Se tibi inter
rotatus saxorum
solatio manifestans.

Nunc inter inclitas
martyrum purpuras
coruscas coronatus.

De Sancto Johanne Apostolo
d. XXVII m. Dec.

[N.06] Johannes Jesu Christo

Johannes, Jesu Christo
multum dilecte virgo:

Tu eius amore carnalem
In navi parentem liquisti.

Tu leve coniugis pectus
respuisti Messiam secutus,

Ut eius pectoris sacra
meruisses fluentia potare.

Tuque in terra
positus gloriam
conspexisti filii dei,

Quae solum sanctis
in vita creditur
contuenda esse perenni.

Te Christus in cruce triumphans
matri suae dedit custodem,

Ut virgo virginem servares
atque curam suppeditares.

Tute carcere
flagrisque fractus
testimonio
pro Christi es gavisus.

Idem mortuos
suscitas inque
Jesu nomine
venenum forte vincis.

Tibi summus
tacitum ceteris
verbum suum pater revelat.

Tu nos omnes
precibus sedulis
apud deum semper commenda,

Johannes, Christi care.

Laus tibi, Christe,

Cui sapit, quod videtur
ceteris esse surdastrum:

Famulatu cuius omnis
competit sexus et aetas.

Recentes atque teneri milites,
Herodiano ense
trucidati, te
hodie praedicaverunt:

Licet necdum potuerint ligula,
effusione tamen
te, Christe, sui
sanguinis praeconati sunt,

Lac cum cruore fundentes
ad deum clamitaturum,

Uda pupilli quem gena
miseret et innocentis.

Quis athletarum
fortissimus umquam
Exercitibus
tantam, Christe, suis
contulit victoriam,

Quantam vagiens
coevulis tuis
Tu praestitisti,
mittens eos caelum
regnaturos perpetim?

O Christi praecones clari
floresque martyrum corusci

... Et confessorum
insignes gemmulae sanctorum

Atque sterilium
in mundo virginum,

Cari filioli,
dulces pusioli:
nos iuvate precibus!

Quas Christus, innocentem
mortem vestram miserans

Pro se maturatam,
placidus exaudiens

nos regno suo dignetur.

In Octava Domini
d. I m. Jan.

[N.08] Gaude Maria virgo

Gaude, Maria,
virgo dei genetrix,

Quae promissis Gabrihelis

Spe devota credidisti.

Numine tu sancti
spiritus repleta
gignis clausa filium,

Qui mundi regit machinam.

In tuo partu
ad turrim gregis
canunt angeli,

Quippe iacente
suo rectore
in praesepio
urbis Bethlemiticae.

Te nomen Jesu edocuit
caelestis nuntius,

Quod circumciso imponeres
intacta filio,

Qui scit solus nostra crimina

Cum patre sanctoque spiritu
rite circumcidere.

Ad tuas manus
magi tria munera deferunt,

Quae vitam nostram
et fidei figurant regulam.

Te primum Christus
potentatus sui
instruxit dolentem gloriam:

Te primo signo
deitatis suae
donaverat vina faciens.

Ergo precamur,
ut nostri reatus
apud clementem patrem
fias interventrix,

Qui te in terris
eius hic parentem
delegit, quem rex caeli
regem generavit.

Et te iam splendentem
in praesentia dei,
Te corde contrito,
te flagitamus,
nos, nos tuorum
ut mansorem viscerum
tueri preceris.

In Theophania
d. VI m. Jan.

[N.09] Festa Christi omnis

Festa Christi
omnis christianitas celebret,

Quae miris sunt modis ornata
cunctisque veneranda populis

Per omnitenentis adventum
atque vocationem gentium.

Ut natus est Christus, est stella
magis visa lucida.

At illi non cassam putantes
tanti signi gloriam

Secum munera
deferunt parvulo,
offerant ut regi caeli
quem sidus praedicat,

Atque aureo
tumidi principis
lectulo transito Christi
praesepe quaeritant.

Hinc ira saevi
Herodis fervida
Invidi recens
rectori genito
Bethleem parvulos praecipit
ense crudeli perdere.

O Christe, quantum
patri exercitum
Juvenis doctus
ad bella maxima
populis praedicans colligis,
sugens cum tantum miseris.

Anno hominis trigesimo
subtus famuli se incliti
inclinaverat manus deus,
consecrans nobis baptisma
in absolutionem criminum.

Ecce spiritus in specie
ipsum alitis innocuae
uncturus sanctis prae omnibus
visitat semper ipsius
contentus mansione pectoris.

Patris etiam insonuit
vox pia, veteris
oblita sermonis:
poenitet me fecisse hominem:

‘Vere filius estu meus
mihimet placitus,
in quo sum placatus.
hodie te, mi fili, genui.

Huic omnes auscultate populi
praeceptori!’

In Purificatione Sanctae Mariae
d. II m. Feb.

[N.10] Concentu parili hic

Concentu parili
hic te, Maria,
veneratur populus
teque piis colit cordibus:

Laetare,
mater et virgo nobilis,
Gabrihelis archangelico
quae oraculo credula
genuisti clausa filium,

Te virga arida Aaron
flore speciosa,
te figurat, Maria,
sine viri semine
nato floridam.

Sed tu tamen, matris virtutum
dum nobis exemplum
cupisti commendare,
subisti remedium
pollutis statutum matribus.

Laetare, quam scrutator
cordis et renum probat
habitu proprio
singulariter
dignam, sancta Maria!

Ergo quique colimus
festa parvuli
Christi propter nos facti
eiusque piae matris Mariae,

Laus patri gloriae,
qui suum filium
gentibus et populo revelans
Israhel nos sociat.

Generosi Abraham
tu filia
veneranda, regia
de Davidis stirpe genita.

In cuius
sacratissimo sanguine
emundatur universitas
perditissimi generis,
ut promisit deus Abrahae.

Tu porta iugiter serata
quam Ezechielis
vox testatur, Maria:
soli deo pervia
esse crederis.

Ad templum detulisti tecum
mundandum qui tibi
integritatis decus
deus homo genitus
adauxit, intacta genitrix.

Exulta, cui parvus
arrisit tunc, Maria,
qui laetari omnibus
et consistere
suo nutu tribuit!

Si non dei possumus
tantam exequi
tardi humilitatem,
forma sit nobis eius genitrix.

Laus eius filio,
qui suo sanguine
nos patri concilians supernis
sociavit civibus.

Laus quoque sancto spiritui sit
per aevum.

Notker Balbulus
Liber Ymnorum

Monasterium Sancti Galli
881 – 887

<http://notker-balbulus.leperlily.org>
